

四庫全書

集部

欽定四庫全書

古詩紀卷六十三

明 馮惟訥 撰

宋第九

謝晦

字宣明陳郡陽夏人初爲宋武帝太尉參軍武

帝受命封武昌縣公少帝卽位加中書令與徐

傅輔政及少帝廢徐美之以晦爲荊州刺史令居

外爲援文帝卽位誅美之等欲并討晦晦舉兵反

軍敗

伏誅

彭城會詩

宋書本傳曰晦爲宋武帝太尉主簿從征關洛帝

於彭城大會命紙筆賦詩晦恐帝有失起諫帝卽

代作
曰

先蕩臨淄穢却清河洛塵華陽有逸驥桃林無伏輪

謝世基

連句詩

宋書曰世基晦之從子也有才氣晦
被誅世基坐從其將刑爲連句詩曰

偉哉橫海鯨壯矣垂天翼一旦失風水翻爲螻蟻食

謝晦續之曰

功遂侔昔人保退無智力既涉太行險斯路信難陟

傅亮

字季友北地靈州人晉義熙中累遷中書黃門侍郎宋武帝受禪加尚書僕射後與徐羨之謝

晦並受顧命同廢少帝奉迎文帝卽位元嘉二年誅○詩品曰季友文余常忽而不察今沈特進撰

詩載其數首亦復平美

從武帝平閩中

鞠旅揚城大蒐徐方旆旌首路元戎啓行弭一作擊楫洪

河總轡崇岡

從征

息徒西楚佇楫舊鄉止猶嶽立動則雲翔烈烈羣師星

言啓行汎舟掩河秣馬登芒

奉迎大駕道路賦詩

宋書本傳曰亮初奉迎大駕道路賦詩三首其一篇有憂懼之辭按本傳宋少帝廢亮立行臺於江陵奉迎文帝疑即此時作也

夙權發皇邑有人祖我舟
餞離不以幣贈言重琳球知
止道攸貴懷祿義所尤
四牡倦長路君轡可以收
張邠結晨軌踈董頓夕輶
東隅誠已謝西景逝不留
性命安可圖懷此作前修
敷衽銘篤誨引帶佩嘉謀
迷寵非予

志厚德良未酬撫躬愧疲朽三省慙爵浮重明照蓬艾
萬品同率由忠誥宣假知式微發直謳

冬至

星昴殷仲冬短晷窮南陸景荔迎時萋芳去應節馥闕

鄭鮮之

字道子開封人初仕晉爲輔國主簿宋武帝踐祚遷太常都官尚書元嘉三年爲尚書右

僕射

行經張子房廟

七雄裂周紐道盡鼎亦淪長風晦崑崙潛龍動泗濱紫

煙翼丹虬靈媪悲素鱗

闕

范泰

字伯倫順陽山陰人也仕宋武帝文帝時爲光祿大夫元嘉五年卒謚曰宣侯

經漢高廟

嘯吒英豪萃指揮五嶽分乘彼道消勢遂廓宇宙氣重
瞳豈不偉奮臂騰羣雄壯力拔高山猛氣烈迅風恃勇
終必撓道勝業自隆

驚鳥

并序

昔蜀賓王結置峻卯之山獲一驚鳥王甚愛之欲其

鳴而不致也乃飾以金樊饗以珍羞對之愈戚三年
不鳴其夫人曰嘗聞鳥見其類而後鳴何不懸鏡以
映之王從其意鸞覩形悲鳴哀響冲霄一奮而絕嗟
乎茲禽何情之深昔鍾子破琴於伯牙匠石韜斤於
郢人蓋悲妙賞之不存慨神質於當年耳矧乃一舉
而殞其身者哉悲夫乃爲詩曰

神鸞棲高梧爰翔霄漢際軒翼颺輕風清響中天厲外
患難預謀高羅掩逸勢明鏡懸高堂顧影悲同契一激

九霄音響流形已斃

詠老

藝文云梁范泰作考
梁無此名附于此

枉生竟何豫未云倏已老華髮飄悴容苦慮棲懷抱疇

昔少年時皆以歸大造

范曄

字蔚宗泰之子也仕文帝時為太子詹事大見
信任乃與孔熙先謝綜共謀弑逆事覺伏誅

樂遊應詔詩

崇威歸朝闕虛寂在川岑山梁協孔性黃屋非堯心軒
駕時未肅文囿降照臨流雲起行蓋晨風引鑾音原薄

信平蔚臺澗備曾深蘭池清夏氣脩悵含秋陰遵渚攀
蒙密隨山上岨嶽睇目有極覽遊情無近尋聞道雖已
積年力互頽侵探已謝丹黻一作感事懷長林

臨終詩

禍福本無兆性命歸有極必至定前期誰能延一息在
生已可知來緣儘無識好醜共一丘何足異枉直豈論
東陵上寧辨首山側雖無稊生琴庶同夏侯色寄言生
存子此路行復即

何長瑜

東海人初為謝方明所致教子惠連讀書靈運過之以為絕倫載之而去與靈運荀雍羊

璿共為山澤之遊時人謂之四友後為臨川王義慶記室參軍廬陵王紹鎮潯陽以長瑜為參軍掌

書記行至板橋遇風溺死

嘲府僚詩

宋書曰何長瑜為臨川王記室參軍嘗於江陵寄書與族人何勗以韻語序臨川州府僚佐云云如此五六句輕薄少年遂演而廣之一時人士竝為品目盡加劇言苦句其文流行臨川怒以白太祖除為廣州曾城令

陸展染鬢

一作白

髮欲以媚側室青青不解久星星行復

出

離合詩

宜然悅今會且怨明晨別肴菽不能甘有難不可雪

荀雍

字道雍潁川人官至員外散騎郎

臨川亭

目極依春路披褐懷良辰明發戒徒御臨流餞歸人

吳邁遠

好為篇章宋文帝聞而召之及見曰此人聯絕之外無所復有好自誇而嗤鄙他人每作

詩得稱意語輒擲地呼曰曹子建何足數哉

飛來雙白鵲

可憐雙白鵲，雙雙絕塵氛。
連翩弄光景，交頸遊青雲。
逢羅復逢繳，雌雄一旦分。
哀聲流海曲，孤叫出一作絕江濱。

豈不慕前侶，為爾不及羣。
步步一零淚，千里猶待君。
樂

哉新相知，悲來

一作矣

生別離，持此百年命，共逐寸陰移。

譬如空山草，零落心自知。

權歌行

十三為漢使，孤劍出臯蘭。
西南窮天險，東北畢地關。
岷

山高以峻燕水清且寒一去千里孤邊馬何時還遙望
煙嶂外瘴氣鬱雲端始知身死處平生從此殘

陽春歌

一作曲

百里望咸陽知是帝京邑綠樹搖雲光春城起風色佳
人愛華景流靡園塘側妍姿豔月映羅衣飄蟬翼守玉
歌陽春已人長歎息雅鄭不同賞那令君愴惻生平重
愛惠私自憐何極

胡笳曲

輕命重意氣古來豈但今緩頰獻一說揚眉受千金邊
風落寒草鳴笳隆飛禽越情結楚思漢耳聽胡音既懷
離俗傷復悲朝光侵日當故鄉沒遙見浮雲陰

長相思

晨有行路客依依造門端人馬風塵色知從河塞還時
我有同棲結宦遊邯鄲將不異客子分饑復共寒煩君
尺帛書寸心從此殫遣玉臺作道妾長憔悴豈復歌笑顏簷
隱千霜樹庭枯十載蘭經春不舉袖秋落寧復看一見

願道意君門已九關虞卿棄相印擔簦玉臺作簦為同歡閨
陰欲早霜何事空盤桓

長別離

生離不可聞況復長相思如何與君別當我盛年時
蕙華每搖蕩妾心空自持榮乏草木歡悴極霜露悲富貴
貌難變貧賤顏易衰持此斷君腸君亦且一作宜自疑淮
陰有逸將折羽謝翻飛楚有扛鼎士出門不得歸正為
隆準公仗劍入紫微君才定何如白日下爭暉

杞梁妻

燈鐺從初明
蘭凋猶早薰
扼腕非一代
千載炳遺文
貞夫淪莒役
杜弔結齊君
驚心眩白日
長洲崩秋雲
精微貫穹旻
高城為潰墳
行人既迷徑
飛鳥亦失羣
壯哉金石軀
出門形影分
一隨塵壤消
聲譽誰共論

楚朝曲

白雲紫鵲荆山阿
洞庭縱橫日生一作生白
波幽芳遠客悲
如何繡被掩口越人歌
壯年流瞻襄成和清貞
空情感

電過初同末異憂愁多窮巷惻愴沈汨羅延思萬里挂
長河翻驚漢陰動湘娥

遊廬山觀道士石室

詩彙作江
總者非

蒙茸衆山裏往來行跡稀尋嶺達仙居道士披雲歸似
著周時冠狀披漢時衣安知世代積服古人不衰得我
宿昔情知我道無為

古意贈今人

玉臺作
鮑令暉

寒鄉無異服羶褐代文練日月望君歸年年不解綰荆

揚春早和幽冀猶霜霰北寒妾已知南心君不見誰為
道辛苦寄情雙飛燕形迫杼煎絲顏落風催電容華一
朝改唯餘心不變

臨終

傷歌入松路斗酒望青山誰非一丘土參差前後間

孔寧子

仕文帝時為鎮西諮議參軍以文義見賞後遷黃門侍郎領步兵校尉

權歌行

君子樂和節品物待陽時上位降繁祉元已命水嬉倉

武戒橋梁旄人樹羽旗高檣抗飛帆羽蓋翳華枝欣飛
激逸響娟娥吐清辭汨汨緬無分欣流愴有思仰關

雲繳俯引沈泉綵委羽漫通渚鮮染中填坻鷁鳥感江

使揚波駭馮夷夕景雖已西關

終無期關

前緩聲歌

供帳設玄宮衆仙胥

關

亞焘焘二儀曠雍容風雲暇北

伐太行鼓南整九疑駕笙歌興洛川鳴簫起秦榭鈞天

異三代廣樂非韶夏滿堂皆人靈列筵必羽化烏可循

日留兔自延月夜弱水時一濯扶桑聊暫舍兆旬方履
端千齡闕八蜡

袁淑

字陽源陳郡陽夏人少有風氣博涉多通元嘉中彭城王起為祭酒累遷尚書吏部郎轉御史

中丞再遷太子左衛率元兇將行弒逆呼淑與蕭斌同力淑力諫不從遂遇害孝武立贈侍中太尉

謚曰忠獻

效子建白馬篇

劍騎何翩翩長安五陵間秦地天下樞八方湊才賢荆
魏多壯士宛洛富少年意氣深自負

一作許

肯事郡邑權

藉藉關外來車徒傾國鄜五侯競書幣羣公亟為言義
分明於霜信行直如弦交歡池陽下留宴汾陰西一朝
許人諾何能坐相捐影節去函谷投珮出甘泉嗟此務
遠圖心為四海懸但營身意遂豈校耳目前俠烈良有
聞古來共知然

效古

評

一作訊

此倦遊士本家自遼東昔隸李將軍十載事西

戎結車高闕下極望見雲中四面各千里從

音橫起嚴

風寒煥豈如節霜雨多異同夕寐北河陰夢還甘泉宮
勤役未云已壯年徒為空廼知古時人所以悲轉蓬

詠冬至

連星貫初厯令月臨首歲薦樂行陰政登金一作贊陽歌

滯收涼降天德萌華宣地惠司瑞記初學記夜晞書雲

作紀

掌朝誓

種蘭

南史曰袁淑從母兄劉湛欲淑附己而淑不
為改意由是大相乖失淑乃賦詩尋以病免

種蘭忌當門懷璧莫向楚楚少別玉人門非植蘭所

登宣城郡

悵焉訊舊老茲前乃楚居十代關州記百祀絕方書

關

王微

一作微宗書王微字景玄琅琊人初為始興王友除南平王鐸右軍諮議參軍仍為中書侍郎

微素無宦情時尚書江湛欲舉微為吏部郎不就卒別有王微仕宗文帝時為廷尉遷交州刺史

襍詩二首

文選載第二首作王景玄景玄王微字也李善五臣皆云王微恐非

桑妾獨何懷傾筐未盈把自言悲苦多排却不肯捨妾

息旦東斤真憂不消台寒鴈歸所從半塗失憑假壯情

欽定四庫全書

古詩紀
卷六十三

十三

拊驅馳猛氣捍朝社常懷雲漢慙常欲復周雅重名好
銘勒輕軀願圖寫萬里度沙漠慙師蹈朔野傳聞兵失
利不見來歸者奚處埋旂麾何處喪車馬拊心悼恭人
零淚覆面下徒謂久別離不見長孤寡寂寂掩高門寥
寥空廣廈侍君竟不歸收顏今就櫬

思婦臨高臺長想憑華軒弄弦不成曲哀歌送苦言箕
帚留江介良人處鴈門誰憶無衣苦但知狐白溫日暗
牛羊下野雀滿空園孟冬寒風起東壁正中昏朱火獨

照人抱景自愁怨誰知心曲亂所思不可論

四氣

蘅若首春華梧楸當夏翳鳴笙起秋風置酒飛冬雪

詠愁

藝文作
王徽

自予抱羈思眇與日月長載離非宋遠誰謂河難航憂
隨積霖密慨因朗旭彰負之苦不勝即之竟無方如彼
引鯢魚待盡守空梁天地豈私貧運至豈固當既悟非
形兆茲數詎可攘

欽定四庫全書

古詩紀
卷六十三

十三

王僧達

琅琊臨沂人太保宏少子初為始興王參軍孝武即位以為尚書右僕射尋出補僧達自

負才地謂當時莫及為征虜將軍吳郡太守孝建三年州孝武不悅以為征虜將軍吳郡太守孝建三年除太常意尤不悅上表解職後以歸順功封寧陵縣侯遷中書令僧達屢經狂逆孝武因事下之獄賜死

釋奠詩

時泰道暢禮備樂修啓庠選俊博教深求異人鱗萃淑
美雲浮師尊訓浹嘉敬載柔

答顏延年

長卿冠華陽仲連擅海陰珪璋既文府精理亦道心君
子聳高駕塵軌實為林崇情符遠迹清氣溢素襟結遊
略年義篤顧棄浮沈寒榮共偃曝春醞時獻斟聿來歲
序暄輕雲出東岑麥壘多秀色楊園流好音歡此乘日
暇忽忘逝景侵幽衷何用慰翰墨久謠吟棲鳳難為條
淑貺非所臨誦以永一作詠周旋匣以代兼金

和琅琊王依古

少年好馳俠旅宦遊關源既踐終古跡聊訊一作評興亡

言隆周為藪澤皇漢成山樊久沒離宮地安識壽陵園
仲秋邊風起孤蓬卷霜根白日無精景黃沙千里昏顯
軌莫殊轍幽塗豈異覓聖賢良已矣抱命復何怨

七夕月下

遠山歛氛侵廣庭揚月波氣往風集隙秋還露泣柯節

氣既已孱

一作節期
既已孱

中宵振綺羅來歡詎終夕收淚泣

分河

朱櫻

初櫻動時豔擅藻灼輝芳緗葉未開蕊

初學作

紅葩已發

光

王素

字休業琅琊臨沂人家貧母老隱居不仕宋孝建大明泰始中屢徵不就

學阮步兵體

沈情發遐慮紆鬱懷所思
髣髴聞簫管鳴鳳接羸姬
聯綿共雲異嫵婉相攜持
寄言芳華士寵利不常期
涇渭分清濁視彼谷風詩

顏竣

字士遜延之子也初隨孝武為撫軍主簿元

光弼遷孝武舉兵入討轉諮議參軍領軍錄事

孝武踐祚累遷吏部尚書諫
諍懇切上意不悅下獄賜死

七廟迎神辭

敬恭明祀孝道感通合樂維和展禮有容六舞肅列九
變成終神之來思享茲潔衷靈之往矣綏我家邦

淫思古意

春風飛遠方紀轉流思堂貞節寄君子窮閨妾所藏裁
書露微疑千里問新知君行過三稔故心久當移


顏師伯

族兄也初隨孝武為徐州主簿帝踐祚累
遷侍中轉吏部尚書廢帝立轉為左僕射奪

其京尹師伯懼與柳元
景謀廢立事泄伏誅

自君之出矣

自君之出矣芳惟低不舉思君如回雪流亂無端緒



古詩紀卷六十三

欽定四庫全書

集部
古詩紀卷六十五

詳校官檢討臣德生

侍讀臣孫球覆勘

總校官知縣臣楊懋珩

校對官助教臣卜維吉

謄錄監生臣陸潮愈

欽定四庫全書

古詩紀卷六十四

明 馮惟訥 撰

宋第十

何偃

字仲宏廬江人元嘉中位太子中庶子孝武時累遷吏部尚書遷侍中卒

冉冉孤生竹

拾遺作
擬古

流萍依清源孤鳥宿深沚蔭幹相經縈風波能終始草
生有日月婚年行及紀思欲待衣裳關山分萬里徒作
春夏期空望良人軌芳色宿昔事誰見過時美涼鳥臨

秋竟歡顧亦云已豈意倚君恩坐守零落耳

荀景

字茂祖元嘉初以文義至中書郎

擬相逢狹路間

樂府作長安有狹邪行

朝發邯鄲邑暮宿井陘間井陘一何狹車馬不得旋迴
迨相逢值崎嶇交一言一言不容多伏軾問君家君家
誠易知易知復易博南面平原居北趣相如閣飛樓臨
名都通門枕華郭入門無所見但見雙棲鶴栖鶴數十
雙鴛鴦羣相追大兄珥金璫中兄振纓綏伏臘一來歸

鄰里生光輝小弟無所為鬪雞東陌達大婦織紉綺中
婦縫羅衣小婦無所作挾瑟弄音徽丈人且却坐梁塵
將欲飛

擬青青河畔草

熒熒山上火苔苔隔隴左隴左不可至精爽通寤寐寤
寐衾幃同忽覺在他邦他邦各異邑相逐不相及迷墟
在望煙木落知冰堅升朝各自進誰肯相攀牽客從北
方來遺我端弋絺命僕開弋絺中有隱起珪長跪讀隱

珪辭苦聲亦悽上言各努力下言長相懷

江智淵

濟陽考城人為隨王誕後軍叅軍累遷從事中郎將誕將為逆智淵請假先返誕事發除

中書侍郎出為新安王長史卒初學作江智泉蓋避唐諱也

宣貴妃挽歌

往襚來塵寂筵俎竟虛存雲松方靄露風草已聲原

湯惠休

字茂遠初入沙門名惠休孝武命使還俗本姓湯位至揚州刺史○詩品曰惠休淫靡情

過其才世遂匹之鮑昭恐商周矣羊曜璠云是顏公忌昭之文故立休鮑之論

怨詩行

明月照高樓含君千里光
巷中情思滿斷絕孤妾腸
悲風盪帷帳瑤翠坐自傷
妾心依天末思與浮雲長
嘯歌視秋草幽葉豈再揚
暮蘭不待歲離華能幾芳
願作張女引流悲繞君堂
君堂嚴且秘絕調徒飛揚

江南思

幽客海陰路留戍淮陽津
垂情向春草知是故鄉人

楊花曲三首

歲華結情宛轉風含思
掩涕守春心折蘭還自遺

江南相思引多歎不成音黃鶴西北去銜我千里心
深堤下生草高城上入雲春人心生思思心長為君

白紵歌二首

琴瑟未調心已悲任羅勝綺彊自持忍思一舞望所思
將轉未轉恒如疑桃花水上春風出舞袖逶迤驚照日
徘徊鶴轉情豔逸君為迎歌心如一

少年窈窕舞君前容華艷艷將欲然為君嬌凝復遷延
流目送笑不敢言長袖拂面心自煎願君流光及盛年

秋風

一作秋歌

秋風嫋嫋入曲房
羅帳含月思心傷
蟋蟀夜鳴斷人腸
長夜思君心飛揚
他人相思君相忘
錦衾瑤席為誰芳

一作徒為芳

秋思引

秋寒依依風過河
白露蕭蕭洞庭波
思君未光光已滅
眇眇悲望如思何

楚明妃曲

瓊臺彩楹桂寢雕甍金閨流耀玉牖含英香芬幽靄珠
彩珍榮文羅秋翠紈綺春輕驂駕鸞鶴往來仙靈含姿
綿視微笑相迎結蘭枝送目成當年為君榮

贈鮑侍郎

見鮑明遠集

玳枝兮金英綠葉兮金莖不入君玉杯低彩還自榮想
君不相艷酒上視塵生當令芳意重無使盛年傾

孔欣

以下齊里無考

置酒高樓上

置酒宴友生高會臨踈櫺芳俎列嘉肴山疊滿春青
廣樂克堂宇絲竹橫兩楹邯鄲有名倡承間奏新聲
八音何寥亮四座同歡情舉觴發湛露銜盃詠鹿鳴
觴謠可相娛揚解意何榮顧歡來義士暢哉矯天誠
朝日不夕盛川流常宵征生猶懸水溜歿若波瀾
停當年貴得意何能競虛名

相逢狹路間

相逢狹路間道狹正踟躕如何不羣士行吟戲路衢
輟

步相與言君行欲焉如淳朴久已凋榮利迭相驅流落
尚風波人情多遷渝勢集堂必滿運去庭亦虛競趨嘗
不暇誰肯眷桑樞無為肆獨往只將困淪胥未若及初
九攜手歸田廬躬耕東山畔樂道詠玄書狹路安足遊
方外可寄娛

祠太廟

束帶從王事結纓奉清祀肅肅禁闈內翳然絕塵軌
我高堂上層構鬱雲起明發修薦享矜悚不遑止磬折

階廊間棲棲常靡已

伍緝之

勞歌二首

幼童輕歲月謂言可久長一朝見零悴歎息向秋霜
連遭已窮極疾病復不康每恐先朝露不見白日光
庶幾盛年時暫遂情所望吉辰既乖越來期眇未央
促促歲月盡窮年空悲傷

女蘿依附松終已冠高枝浮萍生託水至死枯不萎傷

哉抱關士獨無松與期月色似冬草居身苦且危幽生
重泉下窮年冰與澌多謝負郭生無所事六奇勞為社
下宰時無魏無知

袁伯文

楚妃歎

玉墀滴淒露羅幌已依霜逢春每先絕爭秋欲幾芳

述山貧

傭滌倦閭閻耕收憊松丘製荷依露壑零若逗霜洲鬢

垂驚年素膚耗盈帶憂幸有深棲性幽山可以留

湛茂之

歷山草堂應教

南平王鐸有過歷山湛長史草堂詩

閉戶守玄漠無復車馬跡
衰廢歸丘樊歲寒見松栢
身慚睢陽老名忝梁園客
習隱非朝市追常在山澤
離離插天樹磊磊雲間石
持此怡一生傷哉駒度隙

張望

一作晉人

蜡除詩

玄靈告稔謝青龍駕拂軫鮮冰迎流結凝雷垂簷賈人
欣八蜡暢詎知歲聿盡

貧士

荒墟人迹稀隱僻閭閻葦籬自朽損毀屋正寥豁炎
夏無完絺玄冬無暖褐四體困寒暑六時疲饑渴營生
生愈瘁愁來不可割

蕭景

貧士詩

四時迭來往苦辛隨事迫三冬泣牛衣五月披裘客遲
遲春日永憂來安所適季秋授衣節荷裳竟不易班超
棄筆硯婁敬脫挽輓雖云丈夫志終涉自媒迹賢哉顏
氏子飲水常怡懌

徐謖

華林北澗

總長潭兮括遠源下沈溜兮起輕泉廻溪浚兮曲沼阻
衝波激兮瀨淺淺貫九谷兮積靈芝飛清濤兮潔澄連

一作川

王叔之

遊羅浮山

藝文作宋王叔之

菴靄靈嶽開景神封綿界盤址中天舉峯孤樓側挺層
岫廻重風雲秀體卉木媚容闕

擬古

藝文作晉王叔之詩彙作曹毗者非

客從北方來言欲到交趾遠行無他貨惟有鳳皇子百

金我不欲千金難為市

闕

伏系之

詠椅桐詩

亭亭椅桐鬱茲庭
圍翠條踈風綠柯蔭
宇闕

許瑤

詩品有齊朝請許瑤之又云許長於短句詠物或即此也

擬自君之出矣

藝文作宋孝武帝

自君之出矣金翠闇無精思君如日月迴環晝夜生

詠柟榴枕

端木生河側因病遂成妍
朝將雲髻別夜與蛾眉連

閨婦答鄰人

昔如影與形今如胡與越不知行遠近忘却離年月

賀道慶

會稽人
世以儒術顯

離合詩

促席宴閒夜足歡不覺疲詠歌無餘願永言終在斯

信字

沈慶之

字宏先吳興武康人初事文帝累以戰伐有功加建威將軍後為孝武撫軍中兵參軍元

允劬弒逆慶之奉孝武討之孝武踐祚以為領軍將軍兗州刺史封南昌縣公以年滿七十固辭就

第廢帝即位加侍中太尉以盡言諫諍齋藥賜死

侍宴詩

南史云考武嘗歡飲普令羣臣賦詩慶之粗有口
辨手不知書上逼令作詩慶之曰臣請口受師伯
上令顏師伯執筆慶之口受云云
上甚悅衆坐並稱其辭意之美

微生遇多幸得逢時運昌朽老筋力盡徒步還南岡
辭榮此聖世何媿張子房

劉侯

詩一首

南史曰侯彥節子也嘗賦詩云云後彥節
與袁粲謀誅齊高帝不尅死侯亦被害

城上草植根非不高所恨風霜早

王歆之

效孫皓爾汝歌

南史曰河東王歆之嘗為南康劉邕相素輕邕後歆之與邕俱與元會並坐邕謂歆之曰卿昔見臣今能見勸一杯酒否歆之因效孫皓歌答之

昔為汝作臣今與汝比肩既不勸汝酒亦不顧汝年

陸凱

贈范曄詩

荊州記曰陸凱與范曄交善自江南寄梅花一枝詣長安與曄兼贈詩曰

折花逢驛使寄與隴頭人江南無所有

一作別信

聊贈一枝

春

漁父

答孫緬歌

南史曰漁父者不知姓名亦不知何許人太康孫緬為潯陽太守落日逍遙渚際見一輕舟凌波隱顯俄而漁父至神韻蕭灑垂綸長嘯緬甚異之褰裳涉水與之論用世之道漁父曰僕山海狂人不達世務未辨賤貧無論榮貴乃歌云云於是悠然鼓棹而去

竹竿籊籊河水激激相忘為樂貪餌吞鈎非夷非惠聊以忘憂

鮑令暉

詩品曰齊鮑令暉歌詩往往漸絕清巧擬古猶勝唯百願淫矣昭常答考武云臣妹才自

亞於左芬臣才不及太沖爾

擬青青河畔草

裊裊臨牕竹藹藹垂門桐灼灼青軒女泠泠高堂

一作臺

中明志逸秋霜玉顏掩春紅人生誰不別恨君早從戎
鳴絃慙夜月紺黛羞春風

擬客從遠方來

客從遠方來贈我漆鳴琴木有相思文絃有別離音終
身執此調歲寒不改心願作陽春曲宮商長相尋

代葛沙門妻郭小玉作二首

明月何皎皎垂幌照羅茵若共相思夜知同憂怨晨芳
華豈矜貌霜露不憐人君非青雲逝飄迹事成秦妾持
一生淚經秋復度春

君子將遠役遺我雙題錦臨當欲去時復留相思枕題

用常著心枕以憶同寢行行日已遠轉覺思彌甚

古意贈今人

樂府作
吳邁遠

寒鄉無異服氊褐代文練日月望君歸年年不解綻荆
揚春早和幽冀猶霜霰北寒妾已知南心君不見誰為
道辛苦寄情雙飛燕形迫杼煎絲顏落風催電容華一
朝改唯餘心不變

題書後寄行人

樂府作自
君之出矣

自君之出矣臨軒不解顏砧杵夜不發高門晝恒關帳

一作
悼

中流熠燿庭前華紫蘭楊枯識節異鴻歸一作知

客寒遊用暮冬盡除春待君還

樂府作遊取暮春
盡餘思待君還

寄行人

桂吐兩三枝蘭開四五葉是時君不歸春風徒笑妾

古詩紀卷六十四

欽定四庫全書

古詩紀卷六十五

明 馮惟訥 撰

宋第十一

郊廟歌辭

宋南郊登歌三首

顏延之

宋書樂志曰文帝元嘉二十二年詔顏延之造天地郊夕牲迎送神饗神惟樂登歌三篇

夕牲歌

黃威寶命嚴恭帝祖表海炳岱

選作炳海表岱

系唐胄楚靈鑒

濟

選作睿

文民屬睿武奄受敷錫宅中拓宇亘地稱皇聲

天作主月竈來賓日際奉土開元首正禮交樂舉六典
聯事九官列序有牲在滌有潔在俎以薦王衷以答神
祐

迎送神歌

維聖饗帝維孝饗

樂府作養

親皇乎備矣有事上春禮行宗

祀敬達郊禋金枝中樹廣樂四陳陟配在京降德在民

奔精照夜高燎煬晨陰明浮爍沈榮

音詠

深淪告成大報

受釐元神月御按節星驅扶輪遙興遠駕

樂府作舉耀耀振

振

饗神歌

營泰時定天衷思心睿謀筮從建表絕設郊宮田燭置
燿火通歷元旬律首吉飾紫壇坎列室中星兆六宗秩
乾宇晏地區謚大孝昭祭禮供牲日展盛自躬具陳器
備禮容彤儻綴被歌鍾望帝閣聳神蹕靈之來辰光溢
潔粢酌娛太一明輝夜華晷日裸既始獻又終煙薌卷

報清穹饗宗德祚王功休命永福履克

宗明堂歌九首

謝莊

通典曰孝武建元元年使謝莊造郊廟舞樂明堂諸樂歌詩南齊書樂志曰明堂辭五帝漢郊祀歌皆四言宗孝武使謝莊造辭莊依五行數木數用三大數用七土數用五金數用九水數用六周頌我將祀文王言皆四其一句五一句七莊歌太祖亦無定句

迎神歌

宗書曰依漢郊祀四句一轉韻後送神歌放此

地紐謐乾樞回華蓋動紫微開旌蔽日車若雲駕六龍
乘綢繆曄帝京輝天邑聖祖降五靈集構瑤祀聳珠簾

漢拂幌月棲檐舞綴暢鍾石融駐飛景鬱行風懋染盛
潔牲牲百禮肅羣司虔皇德遠大孝昌貫九幽洞三光
神之安解玉鑾景福至萬寓歡

登歌

雍臺辨朔澤宮練辰一作服潔火夕照明水朝陳六瑚賁

室八羽華庭昭事先聖懷濡上靈肆夏戒敬升歌發德
永固鴻基以綏萬國

歌太祖文皇帝

宋書曰依
周頌體

維天為大維聖祖是則辰居萬寓綴旒下國內靈八輔
外光四瀛萬宮仰蓋日館希旌複殿留景重檐結風刮
楹接緯達響承虹設業設虞在王庭肇禋祀克配乎靈
我將我享維孟之春以孝以敬以立我烝民

歌青帝

三言依
木數

參映夕駟照晨靈乘震司青春鴈將向桐始蕤柔風舞
暄光遲萌動達萬品新潤無際澤無垠

歌赤帝

七言依
火數

龍精初見大火中朱光北至圭景同帝在在離寔司衡
水雨方降木槿榮庶物盛長咸殷阜恩覃四冥被九有

歌黃帝

五言依
土數

履建

宋書
作艮

宅中寓司繩御

宋作
總

四方裁化遍寒燠布政

周炎涼景麗條可結霜明冰可折凱風扇朱辰白雲流

素節分至乘結

宋作
涇

晷啓閑集恒度帝運緝萬有皇靈

澄國步

歌白帝

九言依
金數

百川如鏡天地爽且明雲冲氣舉德盛在素精木葉初
下洞庭始揚波夜光徹地翻霜照懸河庶類收成歲功
行欲寧浹地奉渥瑩宇承秋宋作帝靈

歌黑帝

六言作
水數

歲月既晏方馳靈乘坎德司規玄雲合晦鳥一作歸路白

雲一作雪繁亘天涯雷在地時未光飾國典閉關梁四節

遍萬物殿福九域祚八鄉晨晷促夕漏延太陰極微陽
宣鵲將巢冰已解氣濡水風動泉

送神歌

蘊禮容餘樂度靈方留景欲暮開九重肅五達鳳參差
龍已沫雲既動河既梁萬里照四空香神之車歸清都
璇庭寂玉殿虛濬化凝孝風熾顧靈心結皇思

宋宗廟登歌八首

王韶之

宋書樂志曰武帝永初中詔廟樂用王韶之所造
七廟登歌七首又有七廟享神登歌一首并以歌
章太后其辭
亦韶之造

北平府君歌

綿綿遐緒明昭載融漢德未遠堯有遺風於穆皇祖永
世克隆本支惟慶貽厥靡窮

相國掾府君歌

乃立清廟清廟肅肅乃備一作脩禮容禮容穆穆顯允皇

祖昭是嗣服錫茲繁祉聿懷多福

開封府君歌

四縣既序簫管既舉堂獻六瑚庭萬八羽先王有典克
禋皇祖丕顯洪烈永介休祐

武原府君歌

鐘鼓皞皞威儀將將溫恭禮樂致

一作敬

享曾皇邁德垂

仁係軌重光天命純嘏惠我無疆

東安府君歌

鑠矣皇祖帝度其心永言配命播此徽音思我茂猷如玉如金駿奔在陛是鑒是歆

孝皇帝歌

烝哉孝皇齊聖廣淵發祥誕慶景祚自天德敷金石道

被管絃有命既集徽風永宣

高祖武皇帝歌

惟天有命眷求上哲赫矣聖武撫運桓撥功竝敷土道
均汝墳止戈曰武經緯稱文鳥龍失紀雲火代名受終
改物作我宗京至道惟王大業有劭降德兆民升歌清
廟

七廟享神歌

并以歌章
太后廟

奕奕寢廟奉璋在庭笙簧既列犧象既盈黍稷匪芳明

祀惟馨樂具禮充潔羞薦誠神之格思介以休禎濟濟
羣辟永觀厥成

宋世祖廟歌二首

謝莊

世祖孝武皇帝歌

帝錫二祖長世多祐於穆睿考襲聖承矩玄極弛馭乾
紐隆緒闢我皇維締我宗

一作宋

宇刷定四海肇構神京

復禮輯樂散馬墮城澤物九有化浮八瀛慶雲承掖甘
露飛甍肅肅清廟徽徽闕宮舞蹈象德笙磬陳風黍稷

非盛明德惟崇神其歆止降福無窮

宣太后歌

稟祥月輝毓德軒光嗣徽嫺汭思媚周姜母臨萬寓訓
藹紫房朱絃玉籥式載瓊芳

宋章廟樂舞歌十五首

殷淡

字夷遠陳郡長平人歷黃

門吏部郎太子中庶子步兵校尉
大明中以文章見知為當時才士

宋書樂志曰章廟樂舞雜歌悉同用太廟辭唯三
后別撰○梁天監元年周捨議曰周禮王出入奏
王夏大祭祀與朝會同而漢制皇帝在朝奏永至
朝會別奏皇夏二樂有異于禮為乖乃除永至還

用皇夏蓋秦漢以來稱皇故變王夏為皇夏也又禮尸出入奏肆夏賓入大門奏肆夏牲出入奏昭夏宗季失禮神入廟門遂奏昭夏乃以牲牢之樂用接祖考之靈斯皆前代之深疵當今所宜改也

肅成樂

二章○夕牲
賓出入奏

彛承孝典恭事嚴聖浹天奉賁罄壤齊慶司儀具序羽

容夙彰芬枝颺烈黼構周張助寶奠軒酌珍充庭璆縣

凝會琬朱竚聲先期選禮

樂府作會

肅若有承祗對靈祉皇

慶昭膺

尊事威儀輝容昭叙迅恭神明粢盛牲俎肅肅嚴宮謁

藹崇基皇靈降止百祇具司戒誠望夜端列承朝依微
昭旦物色輕宵鴻慶遐邇嘉慶令芳翊帝明德永祚流
光

引牲樂

牲出
入奏

維誠潔饗維孝奠靈敬芬黍稷敬滌犧牲騂鹵在豢載
溢載豐以承宗祀以肅皇衷蕭芳四舉華火周傳神監
孔昭嘉是柔牲

嘉慶樂

嘉豆呈
毛血奏

肇禋戒祀禮容咸舉六典飾文九司昭序牲粢既昭犧
剛既陳恭滌惟清敬事惟神加籩再御兼俎重簠節動
軒越聲流金縣奕奕闕幄疊疊嚴闡潔誠夕鑒端服晨
暉聖靈戾止翊我皇則上綏四寓下洋萬國永言孝饗
孝饗有容儉僚贊列肅肅雍雍

齊樂亦用此分奕
奕以下為一章

昭夏樂

迎神
奏

闕宮黝黝複殿微微璿除肅炤釭壁彤輝黼帟神凝玉
堂嚴馨圓火夕耀方水朝清金枝委樹翠鐙佇縣渟波

澄宿華漢浮天恭事既夙虔心有慕仰降皇靈俯寧休
祚

永至樂

皇帝入廟
北門奏

皇朝崑矣孝容以昭鑒華羽迺拂漢涵濟

宋書
作瀉申申嘉

夜翊翊休朝行金景送步玉風韶師承祀則肅對裡桃

登歌 二章

帝容承祀練時涓日九重徹闕四靈賓室肅倡函音庶
旒委佾休靈告饗嘉慶尚芬玉瑚飾列桂簋昭陳具司

選禮翼翼振振

裸崇祀典耐恭孝時禮無爽物信靡媿辭精華孚鬯誠
監昭通升歌翊節下管調風皇心履變敬明尊親大哉
孝德至矣交神

章德凱容樂

章太
后室

幽瑞浚靈表彰嬪聖翊載徽文敷光宗慶上緯纏祥中
維飾詠永屬輝猷聯昌景命

昭德凱容樂

昭太
后室

明帝

諱彧字休景文
帝子在位七年

表靈躔象纘儀緯風膺華丹耀登瑞紫穹訓彤霄宇武
彰宸宮騰芬金石寫德聲容

宣德凱容樂

宣太后室

天樞凝耀地紐儷輝聯光騰世炳慶翔機薰藹中寓景
躔上徵玉頌鏤德金籥傳徽

嘉祚樂

皇帝還東壁受福酒奏

殷淡

禮薦洽福時

齊作祚

昌皇聖膺嘉祐帝業凝休祥居極乘

景運宅德瑞中王澄明臨四表精華延八鄉洞海周聲

惠徹宇麗乾光靈慶纏世祉鴻烈永無疆

昭夏樂 二章。送神

大孝備盛禮豐神安留嘉樂充旋駕聳汎青穹延八虛
闢四空藹流景肅行風

昭融教緝風度戀皇靈結深慕解羽縣輟華樹背一作偕
璇除端玉輅流汪濊慶國步

休成樂

皇帝詣便殿奏

漢書禮志曰登歌再終下奏
休成之樂美神明既饗也

醜醜具登嘉俎咸蒙饗洽誠陳禮周樂徧祝辭罷裸序
容輟縣蹕動端庭鑒回嚴殿神儀駐景華漢亭虛八靈
案衛三祗解途翠蓋耀澄齊書作
澄耀畢奕凝宸齊作
凝宸玉鑣
息節金輅懷音式誠達孝祗心肅感追憑皇鑒思承淵
範神錫懋祉四緯昭明仰福帝徽俯齊庶生

燕射歌辭

宋四廂樂歌五首

王韶之

宋書樂志曰武帝永初元年有司奏依舊正旦設
樂參詳屬三省改太樂諸歌舞詩黃門侍郎王韶

之立三十二章
合用教司詔可

肆夏樂歌四曲

宗書樂志曰王韶之造四廟樂歌五篇一曰肆夏
樂歌四章客入四廟振作於鑾曲皇帝當陽四廟
振作將將曲皇帝入變服四廟振作於鑾將將二
曲又黃鐘太簇二廟作法章九功二曲。古今樂
錄曰按周禮云王出入奏王夏賓出入奏肆夏
肆夏本施之於賓帝王出入則不應奏肆夏也

於鑾我皇體仁包元齊明日月比量乾坤陶甄百王稽
則黃軒計謨定命辰告四蕃

將將蕃后翼翼羣僚盛服待晨明發來朝饗以八珍樂

以九韶仰祗天顏厭猷孔昭

法章既設初筵長舒濟濟列辟端委皇除飲和無盈威儀有餘溫恭在位敬終如初

九功既歌六代惟時被德在樂宣道以詩穆矣太和品物咸熙慶積自遠告成在茲

大會行禮歌

二曲○宋書樂志曰姑洗廟作

大哉皇宋長發其祥纂系在漢統源伊唐德之克明休有烈光配天作極辰居四方

皇矣我后聖德通靈有命自天誕受休禎龍飛紫極造
我宗京光宅宇宙赫赫明明

王公上壽歌

一曲○宋書樂志曰黃鍾廟作

獻壽爵慶聖皇靈祚窮二儀休明等三光

殿前登歌

三曲○宋書樂志曰別有金石

明明大宋緝熙皇道則天垂化光定天保天保既定肆
覲萬方禮繁樂富穆穆皇皇

沔彼流水朝宗天池洋洋貢職抑抑威儀既習威儀亦

閑禮容一人有則作孚萬邦

烝哉我皇固天誕聖履端惟始對越休慶如天斯久如
日斯盛介茲景福永固駿命

食舉歌

十曲

宋書樂志曰王韶之造食舉歌十章黃鍾太簇二
廟更作黃鍾作晨義體至和王道開元辰禮有容
五曲太簇作五玉懷荒喬皇
猷緝惟永初王道純五曲

晨義載曜萬物咸覩嘉慶三朝禮樂備舉元正肇始典
章暉明萬方畢來賀華喬充皇庭多士盈九位俯仰觀

玉聲恂恂俯仰載爛其輝鼓鐘震天區禮容塞皇闡思
樂窮休慶福履同所歸

五玉既獻三帛是薦爾公爾侯鳴玉華殿皇皇聖后降
禮南面元首納嘉禮萬邦同歡願休哉君臣嘉燕建五
旗列四縣樂有文禮無倦融皇風窮一變

體至和感陰陽德無不柔繁休祥瑞徽璧應嘉鍾舞靈
鳳躍潜龍景星見甘露墜木連理禾同穗玄化洽仁澤
敷極禎瑞窮靈符

懷荒裔綏齊民荷天祐靡不賓靡不賓長世弘盛昭明
有融繁嘉慶繁嘉慶熙帝載合氣咸和蒼生欣戴三靈
協瑞惟新皇代

王道四達流仁布德窮理詠乾元垂訓順帝則靈化侔
四時幽誠通玄默德澤被八紘乾寧軌萬國皇猷緝咸
熙泰禮儀煥帝庭要荒服遐外被髮襲纓冕左袵回衿
帶天覆地載流澤汪濊聲教布獲德光大

開元辰畢來王奉貢職朝后皇鳴珩珮觀典章樂王度

悅徽芳陶盛化遊太康丕昭明永克昌

惟永初德丕顯齊七政敷五典彛倫序洪化闡王澤流
太平始樹聲教明皇紀和靈祇恭明祀衍景祚膺嘉祉
禮有容樂有儀金石陳干羽施邁武濩均咸池歌南風
舜德稱文武煥頌聲興

王道純德彌淑寧八表康九服道禮讓移風俗移風俗
永克融歌盛美造成功詠徽烈邈無窮

鼓吹曲辭

宋鼓吹鐃歌三首

無名氏

宋書樂志曰今鼓吹鐃歌四篇今唯有上邪等三篇其一篇闕古今樂錄曰上邪曲四解晚芝曲九解漢曲有遠期疑是也艾如張三解沈約云樂人以音聲相傳訓詁不可復解凡古樂錄皆大字是辭細字是聲聲辭合寫故致然爾

上邪曲

大碣夜烏自云何來堂吾來聲烏奚姑悟姑尊盧聖子

黃尊來饒清嬰烏白日為隨來郭吾微令吾

一解

應龍夜烏由道何來直子為烏奚如悟姑尊盧雞子聽

烏虎行為來明吾微令吾

二解

詩則夜烏道祿何來黑洛道烏奚悟如尊爾尊盧起黃

華烏伯遼為國日忠兩令吾

三解

伯遼夜烏若國何求日忠兩烏奚如悟姑尊盧面道康

尊錄龍永烏赫赫福祚夜音微令吾

四解

晚芝田

幾令吾幾令諸韓亂發正令吾

一解

幾令吾諸韓從聽心令吾若里洛何來韓微令吾

二解

尊盧忌盧文盧子路子路為路雞如文盧炯烏諸祚微

令吾 三解

幾令諸韓或公隨令吾 四解

幾令吾幾諸或言隨令吾黑洛何來諸韓微令吾 五解

尊盧安成隨來免路路子為吾路奚如文盧炯烏諸祚

微令吾 六解

幾令吾幾諸或言隨令吾 七解

幾令吾諸或言幾苦黑洛何來諸韓微令吾 八解

尊盧公洪隨來免路子子路子為路奚姑文盧炯烏諸

祚微令吾

九解

艾如張曲

幾令吾呼歷舍居執來隨咄武子邪令烏銜鉞相風其

右其右

一解

幾令吾呼羣議破萌執來隨吾咄武子邪令烏令烏今

隲入海相風及後

二解

幾令吾呼無公赫吾執來隨吾咄武子邪令烏無公赫

欽定四庫全書

古詩紀
卷六十五

十七

吾姁立諸布始布

三解

舞曲歌辭

宋前後舞歌二首

王韶之

宋書樂志曰武帝永初元年改晉正德舞曰前舞
大豫舞曰後舞并建賓廟作孝武孝建二年九月
建平王宏議以為祖有功而宗有德故漢高祖廟
樂稱武德太宗廟樂曰昭德魏制武始舞武廟制
咸熙舞文廟則祖宗之廟別有樂名晉氏之樂正
德大豫及宋不更名直為前後二舞依據昔代義
舛事乖宜釐改權稱以凱容為韶舞宣烈為武舞
祖宗廟樂總以德為名若廟祧不毀則樂舞別稱
猶漢高文武咸有嘉號惠景二主樂無餘名章皇
太后廟唯奏文樂明婦人無武事也郊祀之樂無

復別名仍同宗廟而已詔如宏議○古今樂錄曰
宗孝武改前舞為凱容之舞後舞為宣烈之舞

前舞歌

齊書云前
舞凱容歌

於赫景明

一作命

天監是臨樂來伊陽禮作惟陰歌自德

富舞由功深庭列宮懸陞羅瑟琴翽籥繁會笙磬諧音

簫韶雖古九成

一作奏

在今導志和聲德音孔宣光我帝

基協靈配乾儀刑六合化穆自然如彼雲漢為章于天

熙熙萬類陶和當年擊轅中韶永世弗寯

後舞歌

齊書云後
舞凱容歌

假樂聖后寔天誕德積美自中王猷四塞龍飛在天儀

刑萬國欽明惟神臨朝淵默不言之化品物咸德

一作得

告成于天銘勲是勒翼翼厥猷亶亶其仁順天創制因

定和神海外有截九圍無塵冕旒司契垂拱臨民乃舞

大豫

一作凱容

欽若天人純嘏孔休萬民彌新

白紵舞歌詩

無名氏

宋書樂志曰白紵舞歌詩舊新有三篇二篇與晉辭同其一篇異

高舉兩手白鵲翔輕軀徐起何洋洋凝停善睐容儀光

宛若龍轉乍低昂隨世而變誠無方如推若引留且行
宋世方昌樂未央舞以盡神安可忘愛之遺誰贈佳人
質如輕雲色如銀袍以光軀巾拂塵制以為袍餘作巾
四座歡樂胡可陳清歌徐舞降祇神

按此本宋辭
錯其文爾

宋泰始歌舞曲十二首

皇業頌

明帝

皇業沿德建帝運資勳融脣唐重盛軌胄楚載休風堯
帝兆深祥元王衍遐慶積善傳上業祚福啓英聖衰數

隨金祿登歷昌永命維宋垂光烈世美流舞咏

聖祖頌

聖祖惟高德積勳代晉歷永建享鴻基萬古盛音冊
文纘宸馭廣運崇帝聲衍德被仁祉留化洽民靈孝建
締孝業允協天人謀宇內齊政軌宙表燭威流鍾管騰
列聖彞銘賁重猷

明君大雅

虞餘

餘姚人少居
貧好學明帝

時歷中
書令

明君應乾數撥亂紹顏基民慶來蘇日國頌薰風詩天
步或慙艱列蕃扇迷慝廟勝敷九代神謨洞七德文教
洗昏俗武誼清祿挺英勲冠帝則萬壽永齊天

通國風

明帝

開寶業資賢昌謨明盛弼諧先烈武惟略景王勲南康
華容變政文猛績爰著有左軍三王到氏文武贊丞相
作輔屬伊旦沈柳宗侯皆殄亂泰始開運超百王司徒
驃騎勲德康江安謨效殷誠彰劉沈承規功名揚慶歸

我后祚無疆

天符頌

天符革運世誕英皇在館神炫既壯龍驤六鍾集表四
緯駢光於穆配天永休厥祥

明德頌

明德孚教幽符麗紀山鼎見奇醴液涵祉鴈雛耀儀駟
虞遊趾福延億祚慶流萬祀

帝圖頌

帝圖凝遠瑞美昭宣濟流月鏡鹿毳霜鮮甘露降和花
雪表年孝德載衍芳風永傳

龍躍大雅

龍躍戎府玉耀蕃宮歲淹豫野璽屬嬪中江波澈映石
柏開文觀毓花蒞樓凝景雲白鳥三獲甘液再呈嘉穠
表沃連理協成德克動物道積通神宋業允大靈瑞方
臻

淮祥風

淮祥應賢彥生翼贊中興致太平

宋世大雅

虞繇

宋世寧在泰始醉酒歡飽德嘉萬國朝上壽酒帝同天
惟長久

治兵大雅

明帝

王命治兵有征無戰巾拂以淨醜類革面玉儀振旅載
戢在辰中虛巾拂四表靜塵

白紵篇大雅

在心曰志發言詩聲成于文被管絃手舞足蹈欣泰時
移風易俗王化基琴角揮韻白雲舒簫韶協音神鳳來
拊擊和節詠在初章曲乍畢情有餘文同軌一道德行
國靖民和禮樂成四縣庭響美勳英八列陞唱貴人聲
舞飾麗華樂容工羅裳映宋書作日袂隨風金翠列輝蕙
麝豐淑姿秀體允帝衷

宋書鳳銜書伎辭

無名氏

隋書樂志曰鳳凰銜書伎自宋齊以來有之三朝
用之南齊書樂志曰益魚龍之流也元會曰侍中

於殿前跪取其書以授舍人舍人受書升殿跪奏
宋世有辭齊初詔江淹改造至梁武帝普通中下
詔罷之

大宋興隆膺靈符鳳鳥感和銜素書嘉樂之美通玄虛
惟新濟濟邁唐虞巍巍蕩蕩道有餘

清商曲辭

古辭

清商曲古辭一卷已入晉詩其題解係宋人作者
別載於此如碧玉歌汝南王作讀曲民間為彭城
王義康作石城樂臧質作烏夜啼臨川王義慶作
襄陽樂隋王誕作壽陽樂南平穆王作西烏夜飛
沈攸之作今所傳辭類與本旨不同蓋其題義雖
各有所始而詞或非其舊也郭茂倩樂府題下不

書名氏左克明直作古辭
今各仍其舊云齊詩倣此

吳聲歌曲

碧玉歌三首

左克明
作古辭

樂苑曰碧玉歌者宋汝南王之所作也碧玉汝南王妾名以寵愛之甚所以歌之

碧玉破瓜時郎為情顛倒芙蓉陵霜榮秋容故尚好

碧玉小家女不敢攀貴德感郎千金意慙無傾城色

玉臺

作孫
綽

碧玉小家女不敢貴德攀感郎意氣重遂得結金蘭

同前二首

碧玉破瓜時相為情顛倒感郎不羞郎回身就郎抱

玉臺

作孫綽

杏梁日始照蕙席歡未極碧玉奉金杯淥酒助花色

玉臺

作梁武帝

同前

碧玉上宮妓出入千花林珠被玳瑁牀感郎情意深

華山畿二十五首

古今樂錄曰華山畿者宋少帝時懊惱一曲亦變曲也少帝時南徐一士子從華山畿往雲陽見客舍有女子年十八九悅之無因遂感心疾母問其故具以啓母母為至華山尋訪見女具說女聞感之因脫蔽膝令母密置其席下卧之當已少日果差忽舉席見蔽膝而抱持遂吞食而死氣欲絕謂母曰葬時車載從華山度母從其意比至女門牛不肯前打拍不動女曰且待須臾妝點沐浴浴既而出歌曰華山畿君既為儂死獨活為誰施歡若見憐時棺木為儂開棺應聲開女遂入棺家人扣打無如之何乃合葬呼曰神女冢

華山畿君既為儂死獨活

一作生

為誰施歡若見憐時棺

木為儂開

聞歡大養蠶定得幾許絲所得何足言奈何黑瘦為
夜相思投壺不得箭憶歡作嬌時

開門枕水渚三刀治一魚歷亂傷殺汝

未敢便相許夜聞儂家論不持儂與汝

懊惱不堪止上牀解要繩自經屏風裏

啼著曙淚落枕將浮身沈被流去

將懊惱石闕晝夜題碑淚常不燥

別後常相思頓書千丈闕題碑無罷時

奈何許所歡不在間
嬌笑向誰緒

隔津歡牽牛語
織女離淚溢河漢

啼相憶淚如漏
刻水晝夜流不息

著處多遇羅的的
往年少艷情何能多

無故相然我路絕
行人斷夜夜故望汝

一坐復一起黃昏
人定後許時不來已

摩可濃巷巷相羅
截終當不置汝

不能久長離中夜
憶歡時抱被空中啼

腹中如湯灌肝腸寸寸斷教儂底聊賴
相送勞勞渚長江不應滿是儂淚成許
奈何許天下人何限慊慊只為汝

郎情難可道歡行豈挾心見荻多欲繞

松上蘿願君如行雲時時見經過

夜相思風吹窻簾動言是所歡來

長鳴雞誰知儂念汝獨向空中啼

腹中如亂絲憤憤適得去愁毒已復來

讀曲歌八十九首

宋書樂志曰讀曲歌者民間為彭城王義康所作也其歌云死罪劉領軍誤殺劉第四是也古今樂錄曰讀曲歌者元嘉十七年表后崩百官不敢作聲歌或因酒讌止竊聲讀曲細吟而已

花釵芙蓉髻雙鬢如浮雲春風不知著好來動羅裙
念子情難有已惡動羅裙聽儂入懷不

紅藍與芙蓉我色與歡敵莫案石榴花歷亂聽儂摘
千葉紅芙蓉照灼綠水邊餘花任郎摘慎莫擺儂蓮
思歡久不愛獨枝蓮只惜同心藕

打壞木棲牀誰能坐相思三更書石闌憶子夜啼碑
奈何不可言朝看莫牛跡知是宿蹄痕

娑拖何處歸道逢播磨郎口朱脫去盡花釵復低昂

所歡子蓮從曾上度刺憶庭欲死

攪裳渡跣把絲織履故交白足露

上知所所歡不見憐憎狀從前度

思難忍絡髷語猶壺倒寫儂頓盡

上樹摘桐花何悟枝枯燥迢迢空中落遂為梧子道

桐花特可憐
願天無霜雪
梧子解千年

柳樹得春風
一低復一昂
誰能空相憶
獨眠度三陽
折楊柳百鳥
園林啼道歡
不離口

穀衫兩袖裂
花釵鬢邊低
何處分別歸
西上古餘啼
所歡子不與
他人別啼是
憶郎耳

披被樹明燈
獨思誰能忍
欲知長塞夜
蘭燈傾壺盡
坐起歎汝好
願他甘叢香
傾筐入懷抱

通髮不可料
顚顚為誰睹
欲知相憶時
但看裙帶緩
幾

許

憶歡不能食徘徊三路間因風覓消息

朝日光景開從君良燕遊願如卜者策長與千歲龜
所歡子問春花可憐摘插裯襦裏

芳萱初生時知是無憂草雙眉畫未成那能就郎抱
百花鮮誰能懷春日獨入羅幃眠

聞歡得新儂四支懊如垂鳥散放行路井中百翅不能
飛

憐歡敢喚名念歡不呼字連喚歡復歡兩誓不相棄
奈何許石闕生口中銜碑不得語

白門前烏帽白帽來白帽郎是儂良不知烏帽郎是誰
初陽正二月草木鬱青青躡履步前園時物感人情
青幡起御路綠柳陰馳道歡贈玉樹箏儂送千金寶
桃花落已盡愁思猶未央春風難期信託情明月光
計約黃昏後人斷猶未來聞歡開方局已復將誰期
自從別郎後卧宿頭不舉飛龍落藥店骨出只為汝

日光沒已盡宿鳥縱橫飛徙倚望行雲蹀躞待郎歸
百度不一回千書信不歸春風吹楊柳華豔空徘徊
音信闊弦朔方悟千里遙朝霜語白日知我為歡消
合冥過藩來向曉開門去歡取身上好不為儂作慮
五鼓起開門正見歡子度何處宿行還衣被有霜露
本自無此意誰交郎舉前視儂轉邁邁不復來時言
自我別歡後歡音不絕響菜莛持捻泥龕有殺子像
家貧近店肆出入引長事郎君不浮華誰能呈實意

念日行不遇道逢播擗郎查減衣服壞白肉亦黥瘡
歔歔閨中啼斜日照帳裏無油何所苦但使天明爾
黃絲呬素琴汎彈弦不斷百弄任郎作唯莫廣陵散
思歡不得來抱被空中語月沒星不亮持底明儂緒
詐我不出門冥就他儂宿鹿轉方相頭丁倒欺人目
歡但且還去遺信相參伺契兒向高店須臾儂自來
欲行一過心誰我道相憐摘菊持飲酒浮華著口邊
語我不遊行常常走巷路敗橋語方相欺儂那得度

關面行負情詐我言端的畫背作天圖子將負星厯
君行負憐事那得厚相於麻紙語三葛我薄汝羸踈
黃天不滅解甲夜曙星出漏刻無心腸復令五更畢
打殺長鳴雞彈去烏白鳥願得連冥不復曙一年都一
曉

空中人住在高樯深閣裏書信了不道故使風往爾
儂心常慊慊歡行由豫情霧露隱芙蓉見蓮詎分明
非歡獨慊慊儂意亦驅驅雙燈俱時盡奈許兩無由

誰交彊纏綿常持罷作慮作生隱藕葉蓮儂在何處
相憐兩樂事黃作無趣怒合散無黃連此事復何苦
誰交彊纏綿常持罷作意走馬織懸簾薄情奈當駛
執手與歡別合會在何時明燈照空局悠然未有期
百憶却欲噫兩眼常不燥蕃師五鼓行離儂何太早
含笑來向儂一抱不能置領後千里帶那頓誰多媚
歡相憐今去何時來衲襠別去年不忍見分題
歡相憐題心共飲血流頭入黃泉分作兩死計

嬌笑來向儂一抱不能已湖燥芙蓉萎蓮汝藕欲死
歡心不相憐慊苦竟何已芙蓉腹裏姜蓮汝從心起
下帷掩燈燭明月照帳中無油何所苦但使天明儂
執手與歡別欲去情不忍餘光照已藩坐見離日盡
種蓮長江邊藕生黃蘗浦必得蓮子時流離經辛苦
人傳我不虛實情明把納芙蓉萬層生蓮子信重嗇
聞乖事難懷況復臨別離伏龜語石板方作千歲碑
鈐盪與時競不得尋傾慮春風扇芳條常念花落去

坐倚無精魂使我生百慮方局十七道期會是何處
暫出白門前楊柳可藏烏歡作沈水香儂作博山鑪
十期九不果常抱懷恨生然燈不下炷有油那得明
自從近日來了不相尋博竹簾襖襦題知子心情薄
下帷燈火盡朗月照懷裏無油何所苦但令天明爾
近日蓮違期不復尋博子六籌翻雙魚都成罷去已
一夕就郎宿通夜語不息黃蘗萬里路道苦真無極
登店賣三葛郎來買丈餘合匹與郎去誰解斷麕踈

儂亦粗經風罷頓葛帳裏敗許麤疎中

關

紫草生湖邊悞落芙蓉裏色分都未獲空中染蓮子
閨閣斷信使的的兩相憶譬如水上影分明不可得
逍遙待曉分轉側聽更鼓明月不應停特為相思苦
罷去四五年相見論故情殺荷不斷藕蓮心已復生
辛苦一朝歡須臾情易厭行膝點芙蓉深蓮非骨念
慊苦憶儂歡書作後非是五果林中度見花多憶子

西曲歌

石城樂

五曲。左
云古辭

唐書樂志曰石城樂者宋臧質所作也石城在竟陵質嘗為竟陵郡於城上眺矚見羣少年歌謠通暢因作此曲古今樂錄曰石城樂舊舞十六人

生長石城下開窻對城樓城中諸少年出入見依投
陽春百花生摘挿環髻前挽指蹋忘愁相與及盛年
布帆百餘幅環環在江津執手雙淚落何時見歡還
大編載三千漸水丈五餘水高不得渡與歡合生居
聞歡遠行去相送方山亭風吹黃蘗藩惡聞苦籬聲

莫愁樂 二曲

唐書樂志曰莫愁樂者出於石城樂石城有女子名莫愁善歌謠石城樂和中復有忘愁聲因有此歌古今樂錄曰莫愁樂亦云蠻樂舊舞十六人梁八人樂府解題曰古歌亦有莫愁洛陽女與此不同

莫愁在何處莫愁石城西艇子打兩槳催送莫愁來
聞歡下揚州相送楚山頭探手抱腰看江水斷不流

烏夜啼

八曲 左
云古辭

唐書樂志曰烏夜啼者宋臨川王義慶所作也元嘉十七年徙彭城王義康於豫章義慶時為江州

至鎮相見而哭文帝聞而怪之徵還慶大懼伎妾
夜聞烏夜啼聲扣齋閤云明日應有赦其年更為
南充州刺史因此作歌故其和云夜夜望郎來籠
窓窓不開今所傳歌似非義慶本旨古今樂錄曰
烏夜啼舊舞十六人○臨川
王義慶當作彭城王義康

歌舞諸少年娉婷無種迹菖蒲花可憐聞名不曾識
長檣鐵鹿子布帆阿那起詫儂安在間一去數千里
辭家遠行去儂歡獨離居此日無啼音裂帛作還書
可憐烏白鳥彊言知天曙無故三更啼歡子冒聞去
烏生如欲飛飛飛各自去生離無安心夜啼至天曙

籠窻窻不開蕩戶戶不動歡下歲筵簫交儂那得往
遠望千里煙隱當在歡家欲飛無兩翅當奈獨思何
巴陵三江口蘆荻齊如麻執手與歡別痛切當奈何

襄陽樂

九曲○左
云古辭

古今樂錄曰襄陽樂者宋隨王誕之所作也誕始
為襄陽郡元嘉二十六年仍為雍州刺史夜聞諸
女歌謠因而作之所以歌和中有襄陽
來夜樂之語也舊舞十六人梁八人

朝發襄陽城暮至大堤宿大堤諸女兒花豔驚郎目
上水郎擔篙下水搖雙櫓四角龍子幡環環江當柱

江陵三千三西塞陌中央但問相隨否何計道里長
人言襄陽樂樂作非儂處乘星冒風流還儂揚州去
爛漫女蘿草結曲繞長松三春雖同色歲寒非處儂
黃鵠參天飛中道鬱徘徊腹中車輪轉歡今定憐誰
揚州蒲鍛環百錢兩三叢不能買將還空手攬抱儂
女蘿自微薄寄託長松表何惜負霜死貴得相纏繞
惡見多情歡罷儂不相語莫作烏集林忽如提儂去

壽陽樂

九曲○左
云古辭

古今樂錄曰壽陽樂者宋南平穆王為豫州所作也舊舞十六人梁八人按其歌辭蓋叙傷別望

歸之思南平穆王即劉鐸也

可憐八公山在壽陽別後莫相忘

東臺百餘尺凌風雲別後不忘君

梁長曲水流明如鏡雙林與郎照

辭家遠行去空為君明知歲月駛

籠窓取涼風彈素琴一歎復一吟

夜相思望不來人樂我獨愁

長淮何瀾漫路悠悠得當樂忘憂

上我長瀨橋望歸路秋風停欲度

銜淚出傷門壽陽去必還當幾載

西烏夜飛

五曲○左
云古辭

古今樂錄曰西烏夜飛者宋元徽五年荊州刺史
沈攸之所作也攸之舉兵發荊州東下未敗之前
思歸京師所以歌和云白日落西山還
去來送聲云折翅烏飛何處被彈歸

日從東方出團團雞子黃夫婦恩情重憐歡故在傍
暫請半日給徙倚娘店前目作宴瑱飽腹作宛惱饑

我昨憶歡時攬刀持自刺自刺分應死刀作雜棲僻
陽春二三月諸花盡芳盛持底與歡來花笑鶯歌詠
感郎崎嶇情不復自顧慮臂繩雙入結遂成同心去

雜歌謠辭

宋人歌

檀道濟宋之良將有威名為敵所
畏宋主疑而殺之時人哀而作歌

可憐白符鳩枉殺檀江州

元嘉中魏地童謠

南史曰宋元嘉二十七年魏太武帝圍汝南戍文帝遣臧質北救至盱眙太武已過淮自廣陵返攻攻盱眙就質求酒質封搜使與之且報書云不聞童謠言邪虜馬飲江水佛狸死邠年冥期使然非復人事爾爾智識及衆豈能勝苻堅邪頃年展爾陸梁者是爾未飲江太歲未邠耳時魏地有童謠故質引之云

輶車北來如穿雉不意虜馬飲江水虜主北歸石濟死虜欲渡江天不徙

大明中謠

南史曰大明中有奚顯度者為員外散騎侍郎孝武嘗使主領人功而苛虐無道動加捶撻暑雨寒

雪不聽暫休人不堪命時建康縣考因或用方材
壓額及踝脛故民間有此謠又相戲曰勿反顧付
奚度其暴酷如此

寧得建康壓額不能受奚度拍

宋時謠

南史曰宋時用人乖實有謠云

上車不落為著作體中何如作秘書

元徽中童謠

齊書五行志曰元徽中童謠後沈攸之反雍
州刺史張近兒襲江陵殺攸之子元璵等

襄陽白銅蹄郎殺荊州兒

童謠

南史曰齊高帝輔政袁粲劉彥攸節王蘊等皆不同而沈攸之又稱兵反粲蘊雖敗攸之尚存卞彬意猶以高帝事無所成乃謂帝曰比聞謠云云公頗聞不時蘊居父憂與粲同死故云尸著服也服者衣也孝子不在日代哭者楮子也彬謂沈攸之得志楮彥回當敗故言哭也列管謂簫也高帝不悅及彬退曰彬自作此

可憐可念尸著服孝子不在日代哭列管暫鳴死滅族

禾絹謠

南史曰宋明帝時阮佃夫楊運長王道隆皆擅威權言為詔勅郡守令長一缺十除內外混亂官以賄命王阮家富於公室中書舍人胡母穎專權奏無不可時人語云云禾絹謂上也

禾絹閉眼諾胡母大張橐

將士謠

南史曰宗越為將性嚴酷好刑誅時王玄謨御下亦少恩將士為之語曰

寧作五年徒不逐王玄謨玄謨猶尚可宗越更殺我

跋扈謠

宋書武帝紀曰諸葛長人貪淫驕縱帝每優容之劉毅既誅長人懼禍及將謀作亂帝自江陵還長

人到門引前却人閒語帝已密命左右丁旡自慢
後於坐拉馬死牀側與屍付廷尉旡驍勇有力時
人語
曰

勿跋扈付丁旡

石城謠

南史曰袁粲謀舉兵誅齊高帝褚淵發其謀
粲兵敗遇害而淵獨輔政于時百姓語曰


可憐石頭城寧為袁粲死不作褚淵生

二王謠

南史云宋德既衰齊高帝輔政朝野之人情懷彼
此吏部尚書王延之尚書令王僧虔中立無所去

就時人
語曰

二王居平不送不迎



古詩紀卷六十五